

REGLUGERÐ

um breyting á reglugerð nr. 390/1999, um greiðslufrest á aðflutningsgjöldum.

1. gr.

Tollskrárnúmerin 4403.9100 og 4403.9900 bætast við í upptalningu tollskrárnúmera í viðauka I við reglugerðina.

2. gr.

Reglugerð þessi, sem sett er með stoð í 109. og 148. gr. tollalaga nr. 55/1987, með síðari breytingum, og 37. gr. laga nr. 50/1988, um virðisaukaskatt, öðlast gildi 1. janúar 2000.

Fjármálaráðuneytinu, 21. desember 1999.

Geir H. Haarde.

Árni Kolbeinsson.

Nr. 899

16. desember 1999

REGLUR

um rektorskjör.

Reglur um hvernig staðið skuli að kosningu, tilnefningu og embættisgengi rektors, sbr. 3. mgr. 6. gr. laga um Háskóla Íslands nr. 41/1999.

1. gr.

Auglýsing.

Menntamálaráðherra auglýsir embætti rektors laust til umsóknar.

2. gr.

Skilyrði um embættisgengi.

Embættisgengir eru þeir einir, sem skipaðir eru eða ráðnir ótímabundið prófessorar eða dósentar við háskólann í fullu starfi.

3. gr.

Skipunartímabil.

Skipunartímabil rektors er fimm ár, frá 1. júlí að telja til 30. júní að fimm árum liðnum, sbr. þó 11. gr. þessara reglna og ákvæði til bráðabirgða.

4. gr.

Kjörstjórn.

Verkefni kjörstjórnar er að hafa fyrir hönd háskólaráðs umsjón með gerð kjörskrár, ákveða kjördag, annast framkvæmd kosninga, úrskurð kærumála vegna kosninga, utankjörfundaratkvæðagreiðslu og annað er að kosningunni lýtur, svo sem nánar er kveðið á um í reglum þessum.

Þegar umsóknarfrestur um embætti rektors er liðinn, skipar háskólaráð kjörstjórn. Kjörstjórn skal skipuð sex mönnum, tveimur úr hópi stúdenta og fjórum úr hópi starfsmanna háskólans, og skal einn þeirra síðartöldu skipaður formaður kjörstjórnar. Falli atkvæði jöfn í kjörstjórn sker atkvæði formanns úr. Háskólaráð ákveður þóknun kjörstjórnar. Heimilt er kjörstjórn að ráða sér aðstoðarmenn.

5. gr.

Kjörskrá.

Kjörstjórn gerir kjörseðil og gengur frá kjörskrá. Skal kjörskrá lögð fram fjórum vikum fyrir kjördag og liggja frammi í tíu daga. Kætur skulu hafa borist kjörstjórn í síðasta lagi tveimur vikum fyrir kjördag, og skal úrskurður kjörstjórnar liggja fyrir eigi síðar en tíu dögum fyrir kjördag, og hefst þá kosning utan kjörfundar.

Kjörseðlar skulu gerðir í fimm litum. Skal einn liturinn vera fyrir starfsfólk háskólans með háskólapróf sem eru í fullu starfi, annar liturinn fyrir starfsfólk háskólans með háskólapróf sem eru í hlutastarfi, þriðji liturinn fyrir stúdenta, fjórði liturinn fyrir aðra atkvæðisbæra aðila sem eru í fullu starfi og fimmti liturinn fyrir aðra atkvæðisbæra aðila sem eru í hlutastarfi, sbr. 6. gr. þessara reglna.

Nú uppfyllir maður skilyrði til að vera á fleiri en einni kjörskrá og ákveður kjörstjórn þá á hvaða kjörskrá hann skuli vera. Uni hann því ekki skal hann þá, eigi síðar en fyrir lok hæfufrests tveimur vikum fyrir kjördag, tilkynna kjörstjórn á hvaða kjörskrá hann hyggst vera.

Starfsmannasvið háskólans sér um að útbúa kjörskrá starfsmanna háskólans og stofnana hans. Til stofnana háskólans í reglum þessum teljast Raunvísindastofnun háskólans, Tilraunastöð Háskóla Íslands í meinafræði að Keldum, Orðabók háskólans, Landsbókasafn Íslands - Háskólabókasafn, Íslensk málstöð og Stofnun Árna Magnússonar.

Kennslusvið háskólans sér um að útbúa kjörskrá stúdenta háskólans.

6. gr.

Atkvæðisréttur og vægi atkvæða.

Við rektorskjör eiga atkvæðisrétt prófessorar, dósentar, lektorar, vísindamenn, fræðimenn og sérfræðingar skipaðir eða ráðnir í fullt starf og aðrir þeir, sem skipaðir eru eða ráðnir í fullt starf við háskólann og stofnanir hans. Starfshlutfallið 75% og hærra telst fullt starf í reglum þessum. Nú gegnir maður starfi í hlutfallinu 37 - 74%, og fer hann þá með hálf atkvæði. Starfshlutfall sem er lægra en 37% veitir ekki atkvæðisrétt. Nú er starfsmaður, sem að framan greinir, í orlofi og annar ráðinn tímabundið í hans stað og fer hann þá með atkvæðisrétt þess sem er í orlofi. Þá eiga allir stúdentar, sem skrásettir eru í Háskóla Íslands tveimur mánuðum fyrir rektorskjör, atkvæðisrétt. Atkvæði háskólakennara og sérfræðinga og annarra þeirra starfsmanna sem hafa háskólapróf, skulu gilda sem 60% greiddra atkvæða. Atkvæði stúdenta skulu gilda sem 30% greiddra atkvæða, og atkvæði annarra atkvæðisbærra aðila skulu gilda sem 10% greiddra atkvæða alls. Starfsmenn Landsbókasafns Íslands - Háskólabókasafns teljast til annarra atkvæðisbærra aðila í reglum þessum án tillits til þess hvort þeir eru með háskólapróf eður ei.

Nú hefur einhver þeirra sem kosningarétt eiga, lögmæt forföll, og er honum þá heimilt að kjósa utan kjörfundar.

7. gr.

Kosning.

Rektorskjör skal fara fram eigi síðar en sex vikum eftir að umsóknarfrestur rennur út. Miða skal við að kjördagur sé sem næst 15. mars og skal hann auglýstur tryggilega innan háskólans. Kjörfundur skal standa frá kl. 9 árdegis til kl. 18 síðdegis. Kjörstjórn ákveður nánar fyrirkomulag kjörfundar, hvort hann er í einni kjördeild eða fleirum. Talning atkvæða hefst þegar að kjörfundi loknum.

Sá umsækjandi telst hafa hlotið tilnefningu í embætti rektors sem hlýtur meirihluta greiddra atkvæða í almenntri kosningu samkvæmt ákvæðum þessara reglna. Ef enginn fær svo mörg atkvæði skal kjósa að nýju eftir viku um þá tvo sem flest atkvæði fengu. Séu

tveir eða fleiri jafnir í öðru sæti ræður hlutkesti. Þegar kosið er um þá tvo sem flest atkvæði fengu telst sá rétt kjörinn sem fær meirihluta greiddra atkvæða. Séu atkvæði jöfn ræður hlutkesti.

Berist einungis umsókn frá einum umsækjanda sem uppfyllir skilyrði um embættisgengi telst sá hafa hlotið tilnefningu til embættis rektors.

Rektor má endurkjósa.

8. gr.

Tilnefning.

Á fyrsta fundi háskólaráðs að loknum kosningum tilnefnir ráðið þann umsækjanda sem gengið hefur meirihluta greiddra atkvæða.

9. gr.

Skipun.

Menntamálaráðherra skipar háskólarektor.

10. gr.

Embættistaka.

Rektor tekur við embætti 1. júlí. sbr. þó 11. gr. og ákvæði til bráðabirgða.

11. gr.

Frávik.

Nú fellur rektor frá eða lætur af embætti, áður en skipunartímabil hans er liðið og skal þá kjósa nýjan rektor svo fljótt sem því verður við komið, en varaforseti háskólaráðs gegni rektorsstörfum þangað til. Varaforseti háskólaráðs gegnir og störfum rektors ef hann forfallast vegna veikinda eða fær leyfi frá störfum. Ef varaforseti er forfallaður ákveður háskólaráð hvaða prófessor háskólans er kallaður til að gegna rektorsstörfum tímabundið. Fari rektorskjör fram áður en skipunartímabil sitjandi rektors er liðið, þá er hinn nýkjörni rektor kosinn til fimm ára, en það sem eftir er tímabils frá 1. júlí til 30. júní þegar hann tekur við embætti, skal teljast eitt ár.

Ákvæði til bráðabirgða.

Í samræmi við 3. mgr. bráðabirgðaákvæðis laga um Háskóla Íslands nr. 41/1999 situr núverandi rektor Háskóla Íslands út yfirstandandi kjörtímabil sitt, en að því loknu skipar menntamálaráðherra rektor til fimm ára í samræmi við 6. gr. laganna, samkvæmt tilnefningu háskólaráðs, að undangengnum almennum kosningum í háskólanum. Kjörtímabil núverandi rektors hófst 5. september 1997 og lýkur 4. september árið 2000. Kjörtímabil rektors sem skipaður verður til fimm ára skv. 3. mgr. 6. gr. laga um Háskóla Íslands nr. 41/1999, verður frá 5. september árið 2000 til 30. júní árið 2005.

Gildistökuákvæði.

Reglur þessar öðlast þegar gildi. Um leið falla úr gildi ákvæði 3.-6. gr. reglugerðar fyrir Háskóla Íslands nr. 98/1993, með áorðnum breytingum, sem birt var í A-deild Stjórnartíðinda.

Háskóla Íslands, 16. desember 1999.

Páll Skúlason.

Þórður Kristinsson.